

E Obra por wordo bishita den e Sculpture Garden na aeropuerto: E storia tras di “Dancing with the wind” di artista Miriam de L’Isle Simbolisando e union fuerte entre Aruba, Hulanda y Merca



Na November aña pasa Aruba Airport Authority N.V. (AAA) orguyosamente a habri e ‘Sculpture Garden’ na aeropuerto pa promove arte contemporario local na Aeropuerto Internacional Reina Beatrix. Den e Sculpture Garden tin 7 obra unico traha door di artistanan local. Un artista en particular, Miriam de L’Isle kier a desplega e uzo di aluminium y stainless steel den su creacion di “Arte Kinetico”. Arte Kinetico ta obranan di arte cu ta contene partinan cu ta move of ta depende riba movimiento pa su efecto. “Dancing with the wind” ta consisti di 25 cuadra di aluminium incorpora den un leishi. Cada cuadra ta draai individualmente riba su propio axis mientras e obra completo tambe ta draai riba su propio axis door di biento of interaccion suave di e observador. E cuadranan ta pinta den e

colornan cora, blanco y blauw na un banda y blauw turquoise, blanco y geel na e otro banda, simbolisando e banderanan di Hulanda y Merca un banda y di Aruba na otro banda. Ora cu e cuadranan draai e colornan ta bruha den otro birando un espectáculo di color y movimiento, simbolisando e union fuerte entre Aruba, Hulanda y Merca. E base di e obra ta fabrica di stainless steel y ta hisa e obra cu un haltura total di aproximadamente 1.50 meter, dunando e obra completo un proporcion monumental. Ricibi un invitacion cordial for di AAA pa bo pasa y bishita e Sculpture Garden, unda cu bo por aprecia tur 7 obra traha door di artistanan local. E Sculpture Garden ta situa na aeropuerto entre e area di check-in Mericano y inmigracion local na e parti Mericano, net patras di 14Bis Restaurant.